

# Jaarverslaag 2005-2006

De Tempeleers



Stichting De Tempeleers Mestreech  
Kochstraat 6  
6216 ER Mestreech

## **Inhaajd**

Proloog	3
Vastelaovendsleedsje 2006	4
Jaorvergadering Stg. De Tempeleers	6
Oetrope Stadsprins	8
de P.R. kemissie	10
de kemissie Boetegebäöre	12
de kemissie Binnegebäöre	15
de Financieel kemissie	19
de Kanselarijraod	22
in Memoriam	24
de Tempeleers organisatie	26
Epiloog	31
Colofon	32

## Proloog

De jaore koume, de jaore goon  
veer mage e jaor veur uuch versloon.  
Vaan 't vereinigingsjaor 2005-2006  
Doog e redactieteam hiel good zien bès  
um wetenswierdeghe te beriechte  
die veer in 12 maond verriechte.  
Alle kemissies hadde veer opgedrage  
um te make hun eige verslage.  
Vaan binne en boete activiteite  
't bal en 't toeke vaan otoriteite.  
Vaan zitting, kinderrevue en nostalgiasie,  
de gala sponsoraovend en aonkoms aon de statie.  
Vaan wat allemaol dit jaor is gebäörd  
höbbe veer perbere te besjrieve in wäörd.  
Daobij de foto's vaan de eveneminte  
bezörge uuch weer die Vastelaovendsmominte.  
e Zier geslaag seizoen wouwe veer zoe besjrieve  
zoetot dit ouch veur 't naogelach bewaord kin blieve.

Veer winse uuch vööl leesplezeer  
't redactieteam naomes edere Tempeleer.

Mestreech 11 november 2006.

Tempeleers:  
Guy Bannier  
Servé Feij  
Nico Kempeners

## Vastelaovendsleedsje 2006

Nog veurtot 't Vastelaovendssezoen officieel woort ingeloid door de Sjeng Kraft Kompeni op d'n 11<sup>de</sup> vaan d'n 11<sup>de</sup> en de jaorvergadering vaan de Tempeleers op zoondag d'n 13<sup>de</sup> november, voont op zoondag 6 november 2005 de oetverkezing plaots vaan 't Mestreechs Vastelaovendsleedsje 2006.

John De La Haye, dee aon de weeg gestande heet vaan de opriechting vaan S.M.V. had in 't veurjaor vaan 2005 de veurzittershamel euvergedrage aon Nico Kempeners. Op dee 6<sup>de</sup> november woort ten euverstaan vaan 't publiek afsjeid genome vaan John. 't Zouw zien leste publieke optreije weurde want John is in september 2006 vrij oonverwachs gestorve.

Oonder leijing vaan de nuie veurzitter góng via de peers 'nen oproop oet um leedsjes in te sjikke.

28 tekssrijvers/componiste zörgde veur 49 inzendinge. Dao-oet woorte door de selectiekemissie 10 leedsjes geselècteed die op 6 nov. veur 'ne bomvolle zaol door de Mixed Harmony woorte geprizzenteerd.

Nao 'n ierste stumrunde bleve 4 leedsjes euver die in 'n finalerunde nog eine kier gezoonge woorte.

't Publiek beslidsde oeteindelek tot 't leedsje "**Mie fietske**" vaan Noël Fabry en Raymond de Pauw tot Vastelaovendsleedsje 2006 woort oetgerope.



*Refrein:*

Wat 'nen elend, wat 'n pech  
Mie gans nui fietsk dat is weg  
't is neet geklajd, 't is neet gestole  
Meh de gemeente is mie fietsk weg goon hole  
Is dat noe sjiek? Is dat noe sjoen?  
Wat moot iech zonder fietsk doen?  
Mieljaar, wat h b iech noe e leid  
Kin iemes miech vert lle boe mie fietsk steit?

*Coupl t*

Iech koch miech l s e fietsk, zoe nuierw ts model  
M t vaan die hippe kleure en m t 'n sjieke bel  
Iech ging 't oetperbere, zoe midde in de stad  
En h b 't bij e buimke eve neergezat  
En ouch al leep iech gaar neet wied  
Mie nui fietsk bin iech kwiet.

## Jaorvergadering

Zoondag 13 nov. 2005 leep de Redót good vol veur de Goste jaorvergadering vaan de Tempeleers.

Nao 't gebrukelek woord vaan welkom aon o.a. eus minister Maria v.d. Hoeven, euzen ex-Hoeglöstigheid Luc I en lede vaan 't bestuur vaan S.L.V. en S.M.V. woort stèl gestande bij 't euverlije vaan euzen Aajd Stadsprins Theo v. Kan (Prins They III, 1970).

Ouch woort mètdeiling gedoon vaan 't feit tot 't mèt eus Iere-lid Jacques Vijgen neet good ging. Nog gein week nao de jaorvergadering is Jacques op 92 jaorege leeftied gestorve. Wijerop in dit jaorverslag vint geer 'nen In Memoriam euver Jacques.

Es srijver vaan 't jaorverslaag 2004-2005 kraog Lon Cimmermans de gelegenheid dat verslaag te priz-zentere en vaan 'n touwliechting te veurzien. Aonsletend reikde heer 'n aantal 'ierste' exemplare oet aon o.a. euzen ex Hoeglöstigheid Luc I.

Vervolges waors 't woord aon de veurzitter vaan de Kanselarijraad um 'ne merci oet te spreke aon 't adres vaan Ex-Prins Luc I en zien charmante ega Margriet. Op 'n zier humoristische wijs woorte Luc en Margriet bedaank veur de meneer boe-op zie vörm gevege hadde aon 't Prinssjap.

Zoonder cent geine Vastelaovend. Daorum kin en maag d'n Habsjaar neet oontbreke op de jaorvergadering um verslaag te doen vaan alle inkomende en oetgaonde geldstrome. Daankzij de mètwèrking vaan vâöl lui is de Vastelaovend 2006 financiesel gezeen binne de perke gebleve.

Servé Feij had aongegeve tot heer nao 6 jaor kretser te zien gewees, de fakkelt aon aandere zouw wèlle euverdrage. Es daank veur zienen inzatt kraog heer vaan euze Prizzedent 't zèlvere kretserverke opgespangk.



De S.L.V. onderstriepte dat mèt de oetreiking vaan de medaalje vaan verdeenste.

Boe evels 'ne kretser weggeit, zal ouch 'ne nuie kretser mote koume. Es opvolger vaan Servé woort Nico Kempeners geïnstalleerd tot te kretser en in die functie woort heer metein aon 't werk gezatt i.v.m. de installatie vaan Luc Schoonbrood tot Tempeleer.

## Jaorvergadering



Nao veurlezing vaan de beneumingsoorkonde door de kretser en de eidaoflèging op 't maske, kraog Luc de Tempeleersplaquèt en – möts oetgereik en moch heer ziech mèt rech 'nen echte Tempeleer neume.

Veurtot de Prizzedent veuroet zouw goon kieke nao de Vastelaovend 2006 waor 't tied veur get löchtegers nl. de bekindmaking

vaan de Vastelaovendsvierder(s) 2005.

Oet de annoncering vaan euze vice-Prizzedent bleek tot de hierie John en Piet Hamers mèt Edu de Leeuw, in Mestreech beter bekind oonder de naam “de 3 cascadeurs” d'n titel Vastelaovendsvierder 2005 mèt rech verdeend hadde.

Aonsletend maakde de Prizzedent nog bekind tot oondaanks alle werkzaamhede in de binnestad 't Oetrope toch op de Mèrret zouw plaatsvinde.

De cortège vaan de Statie nao de Mèrret zouw evels neet via de Spèlstraot meh via de Helmstraot en Groete Grach z'n indpunt vinde op de Mèrret.

't Groet Gala Prinsebal zouw mèt nui elan en nuie stijl weer in 't Mecc goon plaatsvinde.

Wegens enorm succes zouw de Kinderrevue weurde geprolongeed.

In de roondvraag woort nog gewag gemaak vaan 'nen oproop um 't Mooswief trök nao de Merret te bringe en neet op de Vriethof te laote haange.

Nao aofloop vaan de jaorvergadering bleef 't nog 'n aontal eurkes hiel gezèlleg in de Redót.



## Oetrope Stadsprins

ZOONDAG 29 JANNEWARIE 2006

't Waors dee zoondagmörge in jannevarie kaajt, meh 't waors wel 'n straolende blauw loch.

Dizze mörge woort allein beheers door de vraog “wee weurt ‘t “?

Thema vaan 't Oetrope waor: De Konzèrmeister, 'n hommage aon André Rieu nao de fantastische konzèrs gegeve op 't Vriethof.

e Groet aontal Mestreechse Vastelaovendsvereiniginge, meziekcorpse, zate hermeniekes en 'ne boonte störm vaan verkleiders vergezèlde de Groete Oonbekinde in 'n sfeervol cortège vaan de Spoorweeglaon naor de Merret.

Aongekoume op de Merret naam Mestreech iers nog aofsjeid vaan de Prins vaan verleie jaor, Luc I en Zien Prinses Margriet, oonder 't zinge vaan zien liefleed “Laot de Zon“ Oondertösse woort de Groete Oonbekinde óntdoon vaan zien vermoming en zörgde alle muzikante veur 'n hels kabaal.



En dao stoot heer daan: Prins Norbert I.

In 't dageleks leve steit de nuie Hoeglöstigheid ingesjreve bij de börgeleke stand es

Nicolaas Petrus Joseph Frijns, roopnaom Norbert vaan beroop avvekaot zeende.





NORBERT I

JURIDICULICUS ROCKMANICUS TRIBUNALICUS

Geheim kamerhier vaan vrouwe Zjustitia  
Avvekaot –Ginneraol à décharge vaan 't Wiecker Tribunaol  
Flitskorporaol vaan de Huzare vaan Boreel in de Heerlyckheid Seedorf  
Residerend Centurion vaan de Bilserbaon  
Honorair Sluiskommandant vaan de JoJo-have tot de Voedingsknaar  
Graof vaan 't Vriethof  
Lienhier vaan de Bessing  
Titulair presiderend trompettis vaan de Herremenoetsmie  
Emeritus scrumkaptein vaan de Old Maraboes Association  
Drappokommandat vaan alle Zate Hermeniekes  
Protecteur vaan de Mestreechter Vastelaovend

## De P.R.- kemsissie

De P.R.-kemsissie deit verslaag vaan de versjèllende aktiviteite rond de Vastelaovend.

Dat gebäört door publicatie vaan peersberiechte, radio en tillevisie, us eige info-pagina's en de website [www.tempeleers.nl](http://www.tempeleers.nl).

De kóntakte mèt de studente die in Mestreech woene en studere is vaan groet belaank. Aon de P.R. de taak um die kóntakte te lègke en te onderhawwe, en zoe de studente op te numme in, en hun bekind te make mèt 't speul rond de Vastelaovend.

Spesjaol daoveur is "Vrouw Wielemösj" in 't leve gerope, 'n groete póp gemaak nao 'n figuur oet 'ne kemikke opera vaan Fons Olterdissen.

"Vrouw Wielemösj" is veur d'n tied veuraofgaond aon de Vastelaovend de hospita vaan 'n vaan te veure oetgekoze studente-vereiniging. De vereniging belaoft um "Vrouw Wielemösj" oongesjendeleert door de Vastelaovend te bringe.



De info-pagina's in Maospos en Zoondagsnuits weure gevöld mèt de activiteite rond Vastelaovend.

De Kallepin is e vas onderdeel vaan die pagina's. Eder activiteit weurt hei-op geplaots.



Us eige gezèt, d'n Tempeleer weurt door de P.R.-kemsissie, same mèt de Financieel kemsissie oetgebrach. De P.R. zörg veur de redactionele inhaajd, Fike veur de benudegde duite. Op dees plaots maag 't neume vaan d'n inzats vaan de dames vaan de aqisitie neet oontbreke.

De prizzentatie vaan d'n Tempeleer is altied 'n gezèllege activiteit binne 't Vastelaovendsgebäöre. Ederèin is benuid of heer mèt naom en touwnaom d'r in veurkump.

't Ierste exemplaar geit netuurlik nao d'n Hoeglöstigheid, euveriges woort dit jaor de prizzentatie same mèt 't Beersteeke, 'n initiatief vaan us hoesbrouwerij Brand, gehawwe.

## De P.R.- commissie

Veur ziene bizunderen inzat veur de Mestreechter Vastelaovend, woort 't Tempeleersvläjke door Zienen Hoegen Hoeglöstigheid oetgereik aon Frits Widdershoven, dee mèt alderlei smoesjes naor de prizzentatie waor ontboje. Verpópezak naam heer dees hoeg ondersjeiing in oontvangs.

Op de website [www.tempeleers.nl](http://www.tempeleers.nl) is vaanalles te vinde wat betrèkking heet op de Tempeleersorganisatie.

Geer vint hei de samestelling vaan de vereeniging, neve e stök historie. Ouch kin me op de website terech veur 't aanmeldingsformeleer veur prinsekandidaote, optochregleminte, en veur 't bestèlle vaan kaarte veur diverse activiteite.

Welt geer wete wat veur leedsje bij welke Prins hoort, loert ouch daan op de website. Veer perbere de website zoe actueel wie meugelek te hawwe. Op de fotopagina's kint geer de versjèllende activiteite nog 'ns good beloere. Geer kint ouch zien op wat veur 'n meneer geer us kint ondersteune bij de organisatie vaan de Vastelaovend.



## De kemissie boetegebäore

JAORVERGADERING ZHK D.D. 30-01-2006

't Waor weer euvervol in de Festi-Village, dee al um 18:00 oor ope ging en in 'ne mum vaan tied vol zaot.



Veer kraoge bezeug van buutereedner Ton Donders dee es "Paparazzi-fotograaf" de aonwezege lachend op z'n hand kraog. Oonder 't wakend oug vaan prins Norbert d'n Ierste woort de loterij gehawwe, boebij nómmer ein ('t oontbijt) door Hermenieke "Erremooj Trouf" woort getrokke.



Nómmer elf veel op Hermenieke "De Pro-Beerders" en zij mage daan koumend jaor de meziek verzörge op de ZHK jaorvergadering. De roondvraag woort, traditioneel, groetendeils bepaold door "euze moeljaan vaan de Zate Hermeniekes" Guido.



### *Inhole*

#### 'T BOURGONDISCH PAK

Eder jaor obbenuits is 't veur de Stadsprins en zien familie ein vaan de huugtepunte um op zaoterdagmörge veur 't inhole de Hoegen Hoeglöstigheid veur 't iers te kinne zien in zien Bourgondisch Prinsepak, dat volgens de mode roond d'n tied vaan de Spaonse inquisitie is gesnoje en dat in de vertroujde umgeving vaan zien eige Prinselek pelies. Ummertouw e geheim zoe-es d'r vööl geheimkes zien roond dat Vastelaovendsspeul, meh evegood e raojspeul umtrent de kleur vaan 't pak.

e Huugtepunt umtot me dat es Stadsprins ouch mer eine kier mètmaak. Daoneve waors 't veur alle partije eve

wene want Stadsprins Norbert I en zien Prinses Glauke hadde nog gein zes weke vaan te veure pas hunnen intrèk genome in 't Prinselek Pelies aon de Bilserbaon. Naotot de prizzentatie vaan 't Bourgondisch Prinsepak mèt e dröpke waor bekloonne góng me in sneltreinvaart nao de Lijnwèrkplaots in Lummel.

Dit jaor bestoonte de Blouw Ingele 3 kier 11 jaor en veur die gelegenheid góng, wie



## De kemissie boetegebäore

ummertouw, 't gezèlsjap in d'n trein (de blauwe ingel) nao de statie vaan Mestreech.

In de hal vaan de statie voont nog 'n korte ceremonie plaats.

Veur de statie had ziech al 'n cortège gevörmp en 't Garderizzjemint vaan de Kachelpiepers stoont propel gereid um de Hoeglöstigheid achter de nudege hermenieje nao de Merret te bringe.



### *De Vastelaovendsdaog.*



**DE PRINSELEKE VEENDEL**  
Op de vreuge zondagmörge van Vastelaovend weurt al benkelek 't ierste Eelske of dröpke nao binne geslage es opwermerke. De medaaljes um de naobersjap te iere die mètgedoon höbbe aon oonder aandere de versering vaan 't Prinselek Pelies en de naoventrint, ligke veerdeg. Ouch 't drejbook ligk veer-

deg en de touwspraoke bij de hand. Vaan wiedz aof huurt me de Kachelpiepers in volle bezetting aon marchere en de geluidsinstallatie is oetgetes.

Op 't moment suprème es 't Mesteechs volksleed gespööld weurt oontrold ziech de groete Prinseleke veendel aon de giewel, um veur de koumende drei daog aon te geve tot dit de plaats is boe de machhöbber vaan die koumende drei daog resideert.

### **DE VASTELAOVENDSOPTOCHTE**

Veur väöl vastelaovendsvierders waors daan d'n daag vaan de Groete Optoch aongebroke.

Weke, nein maonde laank hadde zie genejd, getummerd en gevef. Noe waors 't hunnen daag um ziech te prizzentere aon 't Volk vaan Mestreech.

Vaanaof de nui opstèlplaats in Wieck trok d'n optoch, veuraofgegaange door de Kachelpiepers en de Prinsewagel mèt dao-op



## De kemissie boetegebäore

Prins Norbert I, nao de Merret in Mestreech.

'ne Lange boonte störm vaan wagele, keerkes, kojtse, zate hermenieje, gróppe en einzelgänger trokke langs de iereplaots veur d'n theater boe d'n Hoeglöstigheid orelaank kós genete vaan al 't sjoens wat de echte Vastelaovendvierder ineingefisternöld had.

't Waors al duuster veur 't ind vaan d'n optoch de Merret bereik had.

D'n optoch vaan Mestreech is neet te besjrieve. Dit fenomeen mote de lui mètmake um de sfeer en 't plezeer te kinne preuve.



De Familieoptoch op maandag 28 fibberwarie 2006 waors, wie zoe dèks, 'ne zoneuvergote daag. Dit is d'n daag veur de papa's en mama's, de ampa's en ama's mèt kinder en kleinkinder. 'nen Echte familiedaag mèt vööl sjoen gesjinkde en verkleide gróppe.

Eder jaor heet de jury han vol werk um de sjoen oetgedosde gróppe en families op de foto vas te lègke en in good euverlègk de winners aon te wieze.

Nao gearpareed te hóbbe veur Prins Norbert I trèkke de families zingenterend door de straote vaan Mestreech, dèks tot in de late ore.

## De kemissie boetegebäore

### KONKOER,

Zaog 't op dinsdagmörge iers good oet en kós 't Sjik oontbijt vaan Robin Berben veur nommer ein "Erremooj Trouf" druug plaots vinde in kaffee de Belsj, zoe roond de klok vaan 11.11 oor, daonao höbbe veer alle weer gehad wat meugelek waors. Zon, rege, hagele en snie.

Vaanaof 12.30 oor woort de binnestad euvergenome door de Zate Hermeniekes. Oondaanks dit feiselek weer zien toch bijnao alle 47 Hermeniekes langs gewees en kraoge zie veur dees prestatie allemaol d'n Ierste pries.

Daankzij de oondernummers vaan de Vriethof, de Merret en 't Slevrowweplein kóste veer alle Hermeniekes e sjoen prijske geve.

Ziene Hoeglöstigheid Norbert d'n Ierste heet 't ierste deil vaan 't Konkoer aofgenome. (heer moos daonao nao de kinderkestuumwedstrijd in de Festi-Village).

Um 14.00 oor kaom nómmmer ein de Vriethof op en roond 17:30 oor, nómmmer 47 es leste. Dit jaor waore veer gestart met 'n nui opstelling vaan 't Konkoer op de Vriethof. Um miejer lui te laote mètgenete vaan al dat sjoens, zien veer korter bij de kaffees goon stoon en höbbe 'ne taptoeprizzentatie veurgestèld.

D'n taptoe dee veer aon 'n aontal Hermeniekes gevraog hadde waors op dat moment evels nog neet gans oet de verf gekoume.

De actie "Zate Hermeniekes veur Mestreech" waor dit jaor veur de Stiechting MGS die hun zjubilei vierde.

Veer zien gruuts d'r op tot veer hun 888,88 euro höbbe kinne euvermake naomes alle Zate Hermeniekes.



## De kemissie Binnegebäore

### DE KINDERAKTIVITEITE.

De kinderkemissie vaan de Tempelers verzörg eder jaor 'n vieftal activiteite. Dees activiteite numme ouch 'n belangrieke plaats in in 't Vastelaovendsgebäore en weure good bezuk. 't Gezègkde "Wee de jöög heet, heet de touwkoms" is ouch vaan touwpassing op de völe initiatieve die de kinderkemissie oonder leiding vaan Guy Banner organiseert. De kinderkemissie tèlde aafgeloupe seizoen leefs 14 Börgermètwerkers, 'ne Bizunder enthousiaste gròp vrijwèlligers die zier actief zien um alle activiteite good te laote verloupe.

### DE KINDERREVUE OP 5 FIBBERWARIE.

Veur d'n twiede kier woort 'ne kinderrevue georganiseerd in de Festi-Village. Ouch dit jaor waors de revue e groet succes. Leefs 160 kinder prizzenteerde ziech mèt e leedsje, denske, meziek of buut. Dat gebäorde allein, es duo of es gròp en zelfs sjaole en jöögvereininge lete hun talente zien en hure. Alles life en in 't Mestreechs. Mestreech bars vaan 't talent en 't is zaak um dit te koestere en neet verlore te laote goon. Zoe 'ne revue is daan ouch 'n sjoen gelegenheid um al die talente 'ne kans te geve. De prizzentatie waors in han vaan twee kinder same mèt Ursula Garnier en Patrick vaan de Weijer. Es roeje draod koum e revueleedsje gesjreve door Ursula, geregeld aon bod. Dit leedsje zal eder jaor door de ganse zaol gezoonge weure.

"Veer wèlle zinge, danse en goon feeste!

Mèt alle kinder vaan Mestreech.

Want 't is weer bijnao Vastelaovend,

Dus haw mer vas daan goon v'r al op weeg.

Veer goon nao rechts, veer goon nao links en weer nao vöore!

Iech sjöddel mèt m'n vot en zing dit leedsje hel.

Iech gaon miech zeker weke ammezere,

Ja, tot asgoonsdag zit iech lekker in mien vel".



### OPENING

#### KINDERTEIKENWEDSTRIJD OP 11 FIBBERWARIE.

Ouch 't aafgeloupe seizoen is in de hal vaan 't azM weer 'n expositie gewees vaan basissjaole en peuterzaole. De deilnummende sjaole hadde geweldeg hun bès gedoon. De hal weurt zoe eder jaor umgetouverd tot 'n zier lösteg en carnavalesk gebäore, boe zowel de lui in 't hospitaal es de völe bezoekers met groet



## De kemissie Binnegebäore

plezeer nao kiekje. Op zaaterdag 11 fibberwarie waor Prins Norbert I in 't azM present veur de officieel opening en de sjoen educatief prijze, besjikbaar gestèld door vööl sponse, oet te reike.

Wel veel dit jaor op tot de belangstèlling minder aon 't weure waors. Sjaole zien neet mie zoe gaw te motivere um mèt te doen. Daorum geit de kinderkemissie koundend jaor bekieke of ze dees kinderteikenwedstrijd gèt nui elan kint geve. Ein dink steit vas, veer wèlle dit in 't azM blieve organisere, dao 't bekind is tot dees expositie vrög brink aon vööl zoewel kraanke es gezon lui in 't azM..

### 'T GROET KINDERFIES OP 19 FIBBERWARIE.

D'n opzat vaan dit fies blijf e succes. Ouch dit jaor waor 't weer stampensvol in de Festi-Village. Kinder ammeseerde ziech in de grimeerhook, op 't springkösse of in de knutselhook. Ze kósde e denske doen, nao de popcorn kraom goon, meh veural sjoen verkleid ziech laote zien, danse, hosse en springe. Daoneve waore d'r versjèllende optrejes vaan kinder oet de kinderrevue. Ziene Hoegen Hoeglöstigheid kaom oetenaard ouch op bezeug en góng gans op in de groete massa kinder. De hiere Tempeleers höbbe dee zoondeg e record aontal knuipkes kinne oetdeile aon al die kinder wat eder jaor zier weurt geapprecieerd.

### SJAOLEBEZEUK OP 20 FIBBERWARIE.

Op donderdag veur carnaval geit Zienen Hoegen Hoeglöstigheid mèt 'n dillegatie Tempeleers versjèllende sjaole bezeuge. Miestal zien dit sjaole die mètgedoon höbbe aon de kinderteikenwedstrijd of die gevraag höbbe um 'ns aon te koume of e bezunder fies höbbe gehad.



## De kemissie Binnegebäöre

De winners vaan de kinderteikenwedstrijd kriege daan tegeliekertied hunne hoofpries oetgereik.

't Vèlt eder jaor op wat veur meujte de sjaole numme um de Prins en zien Tempeleers te oontvaange. Sjaole prizzentere ziech daan mèt e klein optrejje, beje de Prins gèt aon en aon de innerleke mins weurt ouch good gedach.

Dit jaor is zèlfs 'n traditie in iere herstèld en zien veer 's möriges vreug bij Maison Louis begós. Oet appreciatie veur hunnen inzatz en betrokkenheid bij de Mestreechter Vastelaovend. Daoropvolgend zien d'r 6 sjaole bezeuk.

### KINDERKESTUUMWEDSTRIJD OP 28 FIBBERWARIE.



't Waor dit jaor behuurlek drök. 't Mindere weer zal hei ouch aon höbbe bijgedrage. Door de drökde kós neet ederein al die prachtige creaties zien die ziech op de bühne prizzenteerde aon de deskundige jury, meh 't waor wel hiel gezèlleg in de Festi-Village.

Wat waore ze weer sjoen: pekskes gemaak door de awwers, ama's,

tantes of zelf inein gefisternöld of gewoen gekoch. Kinder dörfde ziech oonbevaange te laote zien aon jury en 't talrieke pebliek. Ze hadde d'r vääöl plezeer in en de winners kraoge op zaoterdag nao carnaval hunne pries in 't lokaal vaan de Stadssjötterij. De kinderkestuumwedstrijd is neet mie weg te dinke, dat bleek dit jaor euverdudelek, gezeen de groete belangstelling.

### *Euverige aktiviteite*

#### ZITTING: 3 FIBBERWARIE 2006

Ouch dit jaor kos me weer terech in kaffee de Zeuten Inval. 't Had neet vääöl gesjeeld, of veer hadde i.p.v. 'ne kaffee e wokrestaurant gehad. D'n ober Noël meinde naomelek tot de hospesse Truus en Mao de kaffee wouwe verkoupe. Mèr dät hadde ze neet tege häöm gezag; ze ginge inkoupe veur de kaffee doen! Noe had d'n ober al 'ne kuiper veur de kaf-



## De kemissie Binnegebäore

fee gevoonde en dee had de ganze zaak metein tot e wokrestaurant umgeboujd. Mèh Truus en Mao wiste op hun meneer de verkoup oongedoon te make en op de toene vaan Lenie Menten de kaffee in de zjuste stumming te bringe. Heibij kraoge ze hõlp vaan Huub Adriaans, "Drei Keuninge", de Mestreechter Kompenei, Jef Verheijde, fantastische streedansereskes, 'ne Chinese Draak (boe oonder 'ne Chinese raad vaan elf mèt Prins zaot), Raymond Schaad alias André Hazes, Geralt, Ziesjoem en 't Mestreechs Vastelaovendsorkes o.l.v. Jean Lambrix.

'T GROET GALA PRINSEBAL Kinnelek had 't gewèrk. De twee veuraonkondiging (ouch nog in 't "Huilands") en oeteindelek de echte oetnudeging veur 't Groet Gala Prinsebal. 'ne Nuie opzat moos deveur zõrge tot d'n avoend es 't woere opgewaardeerd woort. De nui orkeste, de Jack Millionband en Three of a Kind stoonte garant veur e daverend dansfies. 't Optrèjje vaan Beppie Kraft zier laat in d'n avoend waor 'n bezunder verassing.



Ouch aankleing, draankveurzening en de versterking vaan d'n inwendige mins waors aongepak zoetot vaan e good vernuid concep gesproke kos weurde. Nog noets waore zoevööl lui op "De Bal" es dit jaor en nog noets bleve ze zoe laat. De Balgengers vaan de koumende editie mage d'r op rekene tot dizze succesvol ingeslag weeg zie vervolgt geit kriege in de koumende editie vaan 't Groet Gala Prinsebal.

### NOSTALLEGASIE: 18 FIBBERWARIE 2006

Ummertouw miejer echte carnavaliste weite oondertösse dit oerfies vaan de Vastelaovend te vinde.

'n Oonvervals fies in de magniefiek aongekleide Festi-Village boe de lui ziechzelf ammesere kinne in hun onveurstèlbare (miestal) zelf gemaakde creaties. Allein of es gróp diech heerlijk oetleve, ouch dit jaor weer oonder de bezielende meziek vaan 't Mestreechs

Vastelaovendsorkes o.l.v. Jean Lambrix. Teves waore dit jaor Kazjewel en Ziesjoem ouch dao, um de stumming nao nog hoeger sferen te bringe. 't Naaks Geval (pries veur origineelste/sjiekste/apartste creatie) is dit jaor gewonne door de Tee Doeze.

Veur loere oet nao koumend jaor wat de Mestreechse lui zich noe weer bedach hõbbe...



## De kemissie Binnegebäöre

### LSO KONZÈR.

Dit jaor waore d't, door 'n euverweldigende belangstelling, leefs twie konzèrs in Mestreech. 't Is alweer veur de 53ste kier tot dit gebäörde. Raymond Spons waor de dirizjent en heer brach mèt 't LSO 'n gevarieerd program vaan klassieke meziek en bekinde wèrke. Dit alles oetenaard gelardeerd mèt e Vastelaovends-sejske. Daoneve troje op: 't Trio Ongeplök, 'n percussion gróp vaan 't LSO, tuba virtuoos Joost Smeets en Geralt van Gemert. 't Pebliek heet genote vaan de Vastelaovendskonzèrs vaan 't LSO die zoe 'n traditie in iere hawwe.

### KLEVARIE: 23 FIBBERWARIE 2006

De Klevarie zitting, ein vaan de sjoenste Vastelaovendstradities, waor ouch dit jaor weer e groet succes.

E fantastisch optrejje vaan 'n kääor aon Mestreechter artieste mèt es slaag op de vuurpijl d'n entree vaan de Kachelpiepers. Sjik wie eerder jaor weer opnui de kraanke vaan Klevarie op dees meneer 'nen onvergeteleken aovend bezörg weurt. E woord vaan dank aon de directie en metwèrkers vaan Klevarie/Vivre is ouch zier op zien plaots.

e Daankbaar gebäöre um te doen en gèt wat absoluut noets verlore maag goon.

### FEMILIE-OPTOCH 27 FIBBERWARIE.

De kinderkemissie verzörg de zjurering vaan de gróppe bij de familie-optoch. 't Is neet gemekelek veur de jury um oet al die sjoen gróppe winners oet te keze, umtot zie eigelek allemaal 'ne pries verdene. Op zaoterdag nao de carnaval kriege de winners hun prijze oetgereik in het lokaal vaan de Stadssjötterij.



## De Financieel Kermis

### STEUNPILERE

Zoe wie geer uuch welliech nog wel zalt rappelere besteit 't fenomeen 'Steunpileer' en de daobij behurende Steunpilerekemissie al sins 1975. D'n initiatiefnummer vaan "De Steunpileer" waor euzen Tempeleer Miel Cohen en de ierste bijeinkoms vound plaots in café 'La Patraque' 't Bedraag dat in deen tied es 'sponsoring' woort gegeve had e minimum vaan fl III,— en toen waore d'r toch al e zier respectabel aontal lui die de Mestreechter Vastelaovend es Steunpileer wouwe steune.

Noe, anno 2006, höbbe v'r in fibberwarie euze Steunpilere-aovend gehawwe in de Redót. 't Aontal deilnummende Steunpilere bedroog op dat momint ongeveer 400. Evels, heibij zien ouch eus gaste vaan de Gala Sponsoraovend inbegrepe.



10 fibberwarie 2006 woorte al eus gaste mèt partner oetgenudeg in de Redót um dao oonder 't genete vaan e drenkske, e hepke en e stökske meziek hun specifieke en magnifieke Steunpilereplaquèt te koume aofhole. De Plaquèt woort persoonlek door d'n Hoegen Hoeglöstigheid Norbert I oetgereik of umgehaange en dat nog altied veur de minimumbijdrage vaan € 55,55.

De formuul vaan de Steunpilere besteit al zoe'n 31 jaor en heet noets groete wijezinge oondergaange of 't zouw mote zien tot me wel 'ns vaan locatie veranderde. Daorum is de Steunpilerekemissie op zeuk nao vernuiing en dat steit daan ouch te gebäore in 2007.

### DE GALA SPONSORAOVEND.

Ouch dit jaor waors de Gala Sponsoraovend weer 'n euverweldigend succes en waors obbenuits oetverkoch.

Zoe wie bekind is dit d'n aovend boe oondernummend Mestreech ziech op 'n informeel wijs kin treffe in 'n fantastische ambiance op Château Neercanne. Rond 19.00 oor arriveerde de ierste gaste um hun opwachting te make bij d'n Ziene Hoeglöstigheid um de hoegste Tempeleersmedaalje in oontvangs te numme.

## De Financieel Kemissie

Aonsletend verplaotsde de gaste ziech nao de bovezaole um dao, onder 't genete vaan e gleeske champagne en e moondverwenerke, door 'n illuster kienduo, bestaonde oet twie bevallege dames op 'n hilarische en oonvergeteleke meneer teks en oetlègk te kriegede euver 't kienspeul.

D'n euversteek nao de grotte waor gaw gemaak en 't fles kós beginne.

Zoewel de witte es de zwarte brigade vaan 't Château, onder de veurtreffeleke leijing vaan Peter Harkema, hadde weer 'n superieur kwaliteit gelieverd en de hepkes varieerde vaan Ravioli de Ris de Veau tot Langoustines Sautées.

Veur 't iers bestoond de meugelekheid um in de rōstege ambiance vaan 't kestiel zelf te genete vaan e kiesbuffèt.

De muzikaal umliesting woort verzörg door High Voltage, Ivo v.d. Bijl en rond 23.00 oor nog 'n optrejje vaan Erwin.

Nui waor 't kienspeul wat in de plaots waor gekoume vaan 't loterij-gebäöre. Gelèt op de reacties vaan vööl gaste bleek dit element e grandioos succesnómmer. De prieswinners waore zier vergöld mèt prijze zowie 'knien in 't zoer' en 'rolle sjietpepier'.

Eine vaan de winners kraog de lachers op z'n hand wie heer ziene pries 'to rolle sjietpepier' deilde mèt de aander gaste.

Rond de klok vaan 02.00 oor waor 't fles veurbij en kós ederein weer trökkieke op 'ne bizunder geslaagden avend.

## TRÓJSJER ACTIE

Zoe wie eder jaor heet ouch dit jaor weer, euze trósjer Ton Dello ziene rondgaank door Mestreech gemaak. Op dee rondgaank perbeert heer op zien eige, charmante meneer, de Mestreechter middestand d'r vaan te euvertuige tot zie de Tempeleers mote steune. Dees opdrach is beslis gein sinecuur. Gelökkeg slaag heer eder jaor weer d'r in um winkeleigene, hospesse vaan kaffees en oetbaters van restaurants werm te make veur euze Mestreechter Vastelaovend.



Zoe wie eder jaor bepaolt 't loot wee de gelökkege winner vaan La Folie is. La folie is e bronze beeldsje dat de Mestreechter Vastelaovend personifieert. Dit beeldjse, gemaak door Henriëtte Schrover gemaak nao 'n ontwerp vaan Schaepkens, weurt eder jaor geoffreerd aon ein van de deilnummers vaan de trósjer actie. Door 't aonbeje vaan La Folie danke veer in de perseen vaan eine oondernummer alle deilnummers vaan dat jaor. Door loting weurt vasgestèld wee de ier te beurt vèlt.

## De Financieel Kermis



Dit jaor had 't loot bepaold tot Kaffee vaan Bommel die ier te beurt veel. Op 18 fibberwarie, veuraofgaond aon de Nostallegasie, trok Ziene Hoeglöstigheid met zien gevolg naor Vaan Bommel um 't kleinoed te euverhandege. In 'n geweldege ambiance woorte veer

es Tempeleers oontvange door Tommy Hamaekers en zien hoeshawwe. Los vaan 't feit tot Vaan Bommel e gerenommeerd Vastelaovendsbolwerk is, is Norbert I door 't jaor ouch nog 'ne gere gezene gas in dat etablissement. Veur d'n Hoeglöstigheid woars 't daan ouch min of mie 'nen toeswedstrijd.

Staondenterend op 'n geïmproviseerd podium (de leestaofel achter in de kaffee) heet euze Hoeglöstigheid la Folie euverhandeg aon d'n hospes. Gelökkeg tot de taofel vaan 'n gooj kwaliteit woars, aandere woars 't enthousiasme vaan euze Stadsprins bij de oetgeving, de taofel wellich tevööl gewore

Wöörd vaan waardering neet allein veur euze trósjer dee met zienen inzat de actie weer met un prima resultaat heet afgeslote meh zeker ouch veur Vaan Bommel veur de geweldege oontvangs.

### PARTIKULEER ACTIE

Zoe wie eeder jaor höbbe de Tempeleers ouch dit jaor weer de partikuleer actie gehawwe. Dees actie is geriech op ederein in Mestreech dee de Vastelaovend e werm hart touwdreuch en op zien eige meneer financieel wèl steune. Via 'ne poëtische brief vaan de hand vaan Bert Beenkens, 'n bijgevoogde prachtege kaart, gedrök door Kunst Adelt, naor 'n fragmint vaan 'n sjelderij vaan Chrit Rousseau, höbbe de Tempeleers de Mestreechtenere weer verzeuk veur 'n financieel bijdrage (groet of klein). Dees actie, indertied opgezat door Jan van den Bergh, mèt vööl inzat doorgezat door Boy Oliver's, gesteund door e groet aantal vrijwèlligers eder jaor, woort dit jaor weer naor 'n hoeger niveau geluuch. Mènneg zweiddröppelke heet Boy gelaote bij 't verzamele vaan alle adresse. Mie es 1500 lui zien benaderd met 't verzeuk veur 'n klein bijdrage, en e hiel groet gedeelte vaan die lui heet ouch gehuur gegeve aon 't verzeuk. Langs dizze weeg, naomes Boy meh veural ouch naomes de Tempeleers bedaank veur eur bijdrage!

## De Kanselarijraad

### MOMUSAOVEND

Tot De Tempelers de einege riechtege erfgenaome vaan de Momussosjeteit zien maag blieke oet 't gegeve tot in 1945 nao 't ind vaan d'n oorlog d'r 'n euverdrach plaotsvoond vaan versjellende Momusattribute zoe-es oonder aandere 't momuskenon door de resterende lede vaan de Momussosjeteit aon De Tempelers ( boe-oonder de legendarische Frans Thewissen) bij de opheffing vaan diezelfde sosjeteit naor 100 jaor aktief te zien gewees.

De lede vaan de Momussosjeteit, die de veurgengers waore vaan De Tempelers, hadde in hunne tied al plezeer en sjariteit in 't veendel stoon oonder 't motto: Veer laote de rieke lache en geve de erme broed.

Um get vaan deen awwetied te laote herleve viere De Tempeers sins inkele jaore 'ne beslote "awwe Momusaovend" boe-oonder 't genete vaan 'n inkel gleske en 'nen eenvoudige doch voedzaome maaltied d'n aovend weurt doorgebracht, gelardeerd mèt historisch en humoristisch verantwoorde touwspraoke en lezinge, boe-bij d'n awwe Pegasus es spreekgestoolte deens deit.



### SLEUTELEUVERDRACH

Op de Merret aongekoume woort de traditie in iere gehawwe um 't Mooswief te veurzien vaan 'ne chique greuntekrans, tot 't momint waors aongebroke um de hal vaan 't Stadhoes te betrejje veur de machseuverdrach.

Dit kier waore oet den Haag nao Mestreech koume aofzakke d'n hier drs. A. Pechtold, minister vaan bestuurleke vernuiing en keuninkrieksakes, mevrouw drs. Rita Verdonk, minister vaan Vreemdelinge zaken en Integratie en mevrouw



Maria v.d. Hoeven, minister vaan Oonderwies, Cultuur en Wetensjappe.

Wijer had euze börgervajer de nuie Gouverneur Leon Frissen es gas op de iste rij zitte.

't Volk vaan Mestreech, veur zoewied es dat al binne had wete te koume, mós genoege numme mèt 'n staonplaots meh had vaanaof de gaonderij good ziech op wat dao oonder op de mansard allemaol stoont te gebäore.

## De Kanselarijraad



'nen Door de wol geverfde Sirremoniemeister, Jan Janssen, wis op 'n eminente meneer de misstapen vaan "die vaan us" bloet te lègke. Nao hun stök veur stök de spiegel te höbbe veurgehawwe, kaom de Sirremoniemeister tot de gerechvierdegde conclusie tot "die vaan us" veur drei daog hun bieze móste pakke um plaots te make veur d'n Hoeglöstigheid zoetot dee

de koumende drei daog euver 't Mestreechs Vastelaovendsriek kós goon regere. E.e.a. woort ge-effectueerd door de euverhandeging vaan de stadssleutel en de zèlvere scepter.

De bijeinkoms in de hal vaan 't Stadhoes woort beslote mèt 't oetreike vaan 'n aontal presensjes in de vorm vaan pralines, flesse Eels en 'n magnifieke door sókerbekker v. Rooy gemaakde toert, 't verkleie vaan de otoriteite en 't opspaange vaan 'n chique Tempeleersmedaalje.

Neet onvermeld maag daobij blieve tot Trudie en Jo Bosch veur 't vootleech woorte gehaald um te weurde beneump tot Verdeenstelek börger vaanwege 't feit tot zie ziech al jaorelangk belangeloes inzette veur o.a. 't Roed Kruus, de Zonneblom en de financieel kemissie van de Tempeleers.



## De Kanselarijraad

### DE MEDAALJES

Ein vaan de hoegtepunte in de Vastelaovendstied is de touwkinning en oetreiking vaan de medaaljes.

Eder jaor opnui breke ze ziech bij de Kanselarijraad de kop, um mèt e zoe chic meugelek oontwerp te koume veur de Vastelaovendsmedaaljes die daan es dank veur de beweze deenste veur de Mestreechter Vastelaovend op mennege boors gespangk weurt door d'n Hoeglöstigheid.

Veur de Vastelaovend 2006 is gekoze veur de Prinse-orde:

*'t Kleppermenneke.*

In vreuger jaore leep 't kleppermenneke door de straote vaan Mestreech um aon te geve tot get loos waor. Es brand waor kaom heer mèt ziene klepper de lui waarsjouwe. Meh ouch es aander aongelegenhede wereldkundeg gemaak mooste weurde, leep 't kleppermenneke mèt zien kleppers door de straote um daan mèt 'n goj hel stum ze verhaol te doen.




## De Kanselarijraad

De Tempeleers-orde besteit oet versjèllende gradaties. Me kin de Ridder-orde, de Offeseers-orde, de Commandeurs-orde en de Groet-Offeseers-orde. Dit jaor kraog die medaalje de naom vaan 'de Rommedoe' mèt.

'ne Rommedoe is get veur de leefhòbber en moot oet z'n eige nog zjus neet kinne loupe. Mèt get sjoep en get gooj boter op e stòkste roggebroed is 't 'n lekkernij um d'n vinger bij aof te lekke.



## In Memoriam



## In Memoriam

### Ieren-Tempeleer Jacques Vijgen.

Op Goonsdag 23 november vaan verleie jaor hōbbe de Tempeleers, same mèt nog hiel vāōl andere, in de Sintervaoskèrk aofsjeid genome vaan Ieren-Tempeleer Jacques Vijgen.

Op dees plaots wèlle veer nog 'ns eus deep respek oetspreke veur de importante verdeenste vaan Jacques Vijgen veur de stad Mestreech, en hiel in 't bizunder veur de Tempeleers en de Vastelaovend.

Jaor en daag heet heer ziech es "trōsjer" vaan de Tempeleers tot in alle oetheuk vaan de stad 't vuur oet de slōffe geloupe um, same mèt de inspanning vaan andere, te zōrge veur 'nen degeleke financiële bojem onder de Mestreechter Vastelaovend. En mèt succes.

Bijnao gein zaak, gein hotèl, restaurant of kaffee, boe me Jacques Vijgen vaan de Tempeleers neet kōs en boe bijnao niemand hāōm, mèt naome door zien innummen- de meneer boe-mèt heer altied ederein tegemoet trooj, mèt leeg han leet vertrèkke.

Meh wie groet zien verdeenste veur stad en Tempeleers ouch waore, toch bleef Jacques Vijgen ummer de besjeie mins dee noets opgaof euver ziech zelf, meh wel altied belangstèlling en respek tuinde veur 't werk en de verdeenste vaan andere.

En toch, oondaanks die hāōm serende besjeienheid leet heer geinen duvel op zien hart beerste es 't de gooj zaak betrof, en had heer oetgesproke meininge euver wat in zien ouge good waor en euver zake die beter kōste.

Dao-euver kōs Jacques laank en breid disputere, boebij 't wiesvingerke gestiedeg zwejde en heer d'n andere mèt stevege sjouwerklopkes de importantie vaan de zaak lètterlek leet veule.

Ouch op hoege leeftied wie 't goon veur hāōm ummer lesteger woort, bleef zien belangstèlling veur alles wat bij de Tempeleers en in Mestreech gebāōrde zoe groet wie altied, en mennege Hoeglōstigheid dee mèt Jacques ziene verjaordaag bij hāōm thoes op de baank heet gezete, rappeleer ziech de wieze raad dee heer mèt kraog veur de zwoer mer plezerege daog vaan Vastelaovend.

't Waor e welbesteid leve, dat heer mèt plezeer geleaf en mèt andere gedeild heet. Daoveur euzen daank Jacques.

Ieren-Tempeleer mèt hart en ziel!

BB. '06

### CLEMENCE DOORENBOSCH – SMITS

Wie hāōren Henk in 1970 Tempeleer woort, kaom Clemence es vaanzelf in de Tempeleersfamilie terech.

Clemence, of Mence zoe wie ze in d'n umgaank geneump woort, waor de "stèl krach" achter Henk es dee weer veur de ein of aander organisatie op jats waor. Nao d'n doed vaan Henk in 2001 woort 't get stèl roontelum Mence, ze trok ziech mie en mie trōk in hāōr hoes aon de Meerssenerweeg.

't Euverlijke vaan dochter Lilian heet hāōr geknak. Al gaw ging 't mèt de gezondheid vaan Mence hèl achteroet zoetot 'n opnaome in de verpleegkliniek neet kōs oetblieve.

Op 13 juni 2006 sloot Mence veurgood hāōr ouge en waor ze weer same mèt hāōren Henk en hun dochter.

Clemence, adie en bedaank veur dienen inzatz veur de Mestreechter Vastelaovend.

## De Tempeleers

(situatie vaan 11 nov. 2005  
tot 11 nov. 2006)

### *Besjermhier*

Drs. Gerd Leers,  
Börgemeister vaan Mestreech

### *Iere-Besjermhier*

Mr. Philip Houben  
Aajd Börgemeister vaan Mestreech

### *Iere-Tempeleer*

Jacques Vijgen † 18 nov. 2005  
Funs Wolfs

### *Protecteursraad*

Drs. Gerd Leers, veurzitter  
Drs. L. Brans Brabant  
Dr. Ir. J.G.M. de Jong  
M.M.J. Mourmans  
R. Persoon  
Dr. ir. J. Ritzen  
E. Rosier  
E. de Vries  
Ir. J. van de Water  
Drs. A. Wintels

### *Bestuur*

Peter Reijnders, Prizzedent  
Jean-Louis Tuinstra, Vice-Prizzedent  
Nico Kempeners, 1<sup>e</sup> kretser  
Henk de Jong, Habsjaar

Frans Buytendijk,  
veurz. Kanselarijraad  
Hans Linnemann,  
veurz. Binnegebäöre  
Willy Verweij,  
veurz. Financieel kemissie  
Fred Sleebe,  
veurz. P.R. kemissie  
Maurice v. Engelshoven,  
veurz. Boetegebäöre

### *Vervolg bestuur*

Jan Janssen, Sirremoniemeister  
Willy Massot, directeur Maggezijn  
Frits Jongen, medaaljelesjatbewaorder/  
oetbelder

### *Lede*

Guy Bannier  
Ger Beckers, tot miert 2006  
Bert Beenkens  
Jan van den Bergh  
Lou Buytendijk  
Lon Cimmermans  
John van Dijk  
Rob Dohmen  
Servé Feij  
Pol Feron  
Wielie Fey  
Wim Fischer  
Herman Frantzen  
Léon Geurtjens  
Tom Gilissen  
Willy Hageman  
Han Hoogma  
Marcel Janssen  
Vic Kamm  
Pascal Keulers  
Bèr Kleijnen  
Willem Kroon  
Loe Lausberg  
Jef Loontjens, Sikkertaris-Ginneraol  
Boy Olivers  
Charles Peeters  
Jo Ramaekers  
Luc Schoonbrood  
Pie Steffens  
Lou Vleugels  
Raymond Willems  
John Zeguers

## De Tempeleers

### DE ORGANISATIE

#### *Kemissie Boetengebäöre*

Maurice van Engelshoven, veurzitter  
Daniëlle Bollen-Berghmans  
Rob Dohmen  
John van Dijk  
Peter van de Eerden  
Tiny Engelbert-Lejeune  
Pol Feron  
Leon Hensels  
Han Hoogma  
Frans Jozef Jansen  
Jan Janssen  
Nico Kempeners  
Loe Lausberg  
Frans Leltz  
Jef Loontjens  
Jef Persoon  
Jo Ramaekers  
Jean Rossell  
René Stallinga  
Twajjn Vermin  
Jacques Vijgen † 18.nov. 2005

#### *Maggezijn*

Willy Massot, directeur  
Pierre Dassen, maggezijsmeister  
Harry Aerds  
Leo Beckers  
Frans Boesten  
Jacques Cramer  
Pedro Dassen  
Jan Hameleers  
Roger Hameleers  
Michel Junglesleger  
Clim Trines  
Charles Walthie

#### *De Trèkkers*

Servé Meerten, veurzitter  
Peter Aarts  
Raymond Bergmans  
Raymond Brands  
Ralf Caenen  
Hennie Coenen  
Ton Dello

Jos Detisch  
Guido van Dijk  
Rinus de Groof  
Herman Kersten  
Francois Pletsters  
Marcel Rassin  
René Stallinga  
Ed Strijp  
Peter Stroes  
Jacques Vijgen † 18 nov. 2005  
John Wagemans  
Marcel Zeegers

#### *Kemissie Binnegebäöre*

Hans Linnemann, veurzitter  
Guy Bannier  
Marion de Bont  
Gerda Boty-Prinse  
Vincent van der Broeck  
Iris Castro  
John van Dijk  
Fabienne Duchateau  
Ursula Garnier  
Noël Jaegers  
Roel Janssen  
Henk de Jong  
Pascal Keulers  
Marijke Kroon  
Willem Kroon  
Rens Lasoe  
Lilian Limpens  
Patrick Muijtjens  
Susanne Muijtjens-Loontjens  
Roger Niël  
Jef Persoon  
Luc Schoonbrood  
Huub Stevens  
Ed Strijp  
Peter Stroes  
Frans Theunisz  
Frank Verhees  
Etiënne Vroemen  
Henk Weerts  
Patrick van de Weyer  
Evert-Jan Zelders

## De Tempeleers



## De Tempeleers

### *Kanselarijraad*

Frans Buytendijk, veurzitter  
Bert Beenkens, raadshier  
Wim Fischer, raadshier  
Jan Janssen, Sirremoniemeister  
Frits Jongen, Medaaljelesjatbewaorder  
Jef Loontjens, Sikkertaris-Ginneraol  
Boy Olivers, raadshier  
Jean-Louis Tuinstra, Vice-veurzitter  
Raymond Willems, Marchal Funkeleer

Nico Brennert, chauffeur Prins  
Bèr Janssen, chauffeur Tempeleers

't Garde-Rizzjemint de Kachelpiepers

### *Kretserij/Archief*

Nico Kempeners, 1e kretser  
Boy Abrahams, hoffotograaf  
Ger Beckers, archivaris, tot miert 2006  
Jopie Franssen  
Denise Lardenoye  
Egon Smeets

### *P.R. Kemissie*

Fred Sleebe, veurzitter  
Ger Beckers, tot miert 2006  
Rob Christiaans  
Lon Cimmermans  
Servé Feij  
Frits Jongen  
Bèr Kleijnen  
Loe Lausberg  
Charles Peeters  
Nicole Sleebe

### *Financieel Kemissie*

Willy Verweij, veurzitter  
Barry Berghmans  
Henri Borgignons  
Jo Bosch  
Trudie Bosch-Keerssmeeckers  
Ton Dello  
Wielie Fey  
Leon Geurtjens  
Willy Hageman  
Marcel Janssen, 2de Habsjaar  
Boy Olivers  
Katja Rodts  
Ton Schoenmaeckers  
Lizette Stallinga  
John Zeguers

### *Kemissie Gala Sponsor aovend*

Leon Geurtjens, veurzitter  
Tom Gilissen  
Miel Keerssmeeckers, kretser  
Pascal Keulers  
Raymond v.d. Nobelen  
Luc Overhof  
Math Schoenmaeckers  
Servé Tillie  
Willy Verweij  
Eugène Vingerhoeds  
Sjaak Waltmans  
Funs Wolfs



## Epiloog

Es samestellers vaan dit jaorverslaag hope veer tot geer obbenuits de Vastelaovend 2006 hób mage mètbeleve.

't Waor e good seizoen boe de eveneminte good zien geslaag en boe veer gruuts op trökkieke.

Veer hóbbe neet de pretentie gehad um alle activiteite te besjrieve, daoveur zien d'r in e seizoen ouch hiel erg väöl. Veer hope tot geer dat kint begriep.

Meh dit beukske gief toch 'n good euverziech vaan 't afgelopen jaor en 't gief 'n euverziech wat de Tempeleers hóbbe gedoon in 't belang vaan de Mestreechter Vastelaovend en gemeinsjap.

De Tempeleers hóbbe dat evels neet allein gedoon en zien daorum dank versjöldeg aon:

B&W en de Gemeinteraod Mestreech  
D'n Deens Stadsbeheer en Facilitaire zake

Brandweer

Pelitie

GGD

Alle Börgermètwerkers in de versjellende kemissies

Ederein dee door ziene/häöre financiële steun de rangatie vaan de Vastelaovend meugelek maakde.

Mer veural bedaanke veer hiel gruuts

**'t Volk vaan Mestreech**

## Colofon

Oetgaof	Stiechting De Tempeleers p/a Kochstraot 6 6216 ER Mestreech
Samestelling	Tempeleers Guy Bannier, Servé Fey en Nico Kempeners
Bewèrk door	Tempeleer Jean Louis Tuinstra
Oplaog	650 stöks
Foto's	Boy Abrahams en Noël Jaegers
Drök	Drökkerij T.O. Offset - Gijseberg, Hertogsingel 9, Mestreech